

# Mes piz: Piz Chavalatsch

DA DAVID TRUTTMANN/FMR

■ Nua sa chatta il punct il pli a l'ost en Svizra? Wer hat's erfunden? – Exact, ils Jauers! Il Piz Chavalatsch vala numnadain sco punct il pli a l'ost dal pajais, in piz da cunfin tranter Svizra ed Italia u meglier ditg tranter Svizra e Tirol dal sid u anc meglier ditg tranter la Val Müstair ed il rest dal mund. Pli baud era il piz fermativa e ruta per la cuntrabanda tranter ils dus pajais, lieu per «schmugglar» café, cigaretas e sacharin. E perquai ha il stadi talian bajegià a ses temp sisum il piz ina clap chasa da dazi or da crap per marcar preschientscha e per far tema als cuntrabandiers. Ma la cuntrabanda na renda betg pli, Schengen e Dublin èn en vigur, uschia ch'oz serva la chasa da dazi sco staziun da relais per ils «funkers» amatur dal Tirol, inclusiv gronda antenna da var diesch meters autezza. La gronda crush da lain sin il piz fa però bunamain concorrenza a l'antenna. La vista panoramica è ina da las pli vastas en la regiun: En il sid èn ils 3905 meters da l'Ortler davanti il nas, vers ost la gruppa dal Ötztal e l'entir Vinschgau, vers vest la gruppa dal Bernina e vers nord e nordvest datti



Il Piz Chavalatsch, il piz il pli a l'ost da la Svizra, si da la vart taliana.

ILLUSTRAZIUN FMR

la pli bella vista insumma, quella vers la Val Müstair!

## Cifras e fatgs:

Num:	Piz Chavalatsch
Auters num:	Monte Cavalaccio (tal.)
Autezza :	2763 m s.m.
Ascensiun:	Da Müstair ca. tschintg uras

En ina pitschna seria cun il titel «Mes piz» preschenta la redacziun da la FMR quests dis mintgadi in piz – tranter Müstair e Tschamut. Quella «pizzeria» vali la paina da scuvrir questa stad da «distanza», cun chaminar enfin sisum u alura era mo cun contemplar ils pizs da utens, sco lieu da desiderì.

